



REPUBLIKA E SHQIPËRISË
KOMISIONERI PËR MBROJTJEN NGA DISKRIMINIMI

Nr. 747/5 prot.

Tiranë, më 11 . 12 . 2023

V E N D I M

Nr. 245, datë 11 . 12 . 2023

Mbështetur në nenin 32, pika 1, shkronja a), të ligjit nr. 10221, datë 04.02.2010 “Për Mbrojtjen nga Diskriminimi¹”, i ndryshuar, Komisioneri për Mbrojtjen nga Diskriminimi² mori në shqyrtim ankesën me nr. 121, datë 16.06.2023³, të Shoqatës Rinore Sportive Studenti (SHRSS) kundër Federatës Shqiptare Taekwondo-World (FSHT), në të cilën pretendohet për diskriminim për shkak të “përkatësisë në një grup të veçantë⁴”.

Në përfundim të shqyrtimit të ankesës, Komisioneri për Mbrojtjen nga Diskriminimi,

K O N S T A T O I:

I. Parashtrimi i fakteve sipas subjektit ankues.

Sipas shpjegimeve të dhëna në formularin e ankesës dhe me e-mail-in datë 06.07.2023, subjekti ankues, në mes të tjerash informon se: “Shoqata ka qenë vazhdimisht subjekt i diskriminimit në vendimet e marra nga Komisionet e Federatës Shqiptare Taekwondo, në të cilën shoqata është tashmë anëtare me të drejta të plota.

SHRSS, e cila ka kontratë bashkëpunimi me Klubin Studenti, është emëruar në datën 25 Mars në Asamblenë e Përgjithshme të Federatës, si anëtare me të drejta të plota.

¹ Në vijim do t’i referohemi me akronimin LMD.

² Në vijim do t’i referohemi me akronimin KMD ose Komisioneri.

³ Ankesa është plotësuar nga subjekti ankues/Shoqata, me informacionin dhe dokumentacionin e dërguar me e-mail-in datë 06.07.2023.

⁴ Si Shoqatë e aderuar në Klubin Studenti, fakt të cilin Federata e ka kundërshtuar.

Ankesa vjen për një vendim të marrë në muajin korrik 2022, në Komisionin Ekzekutiv të FSHT-së, për masë disiplinore “Vërejtje” ndaj Shoqatës tonë.

Komisioni Ekzekutiv nuk e ka rrëzuar si të paligjshme këtë masë. Kërkesat tona kanë qenë të vazhdueshme për rrëzimin e vendimit dhe marrjen e një vendimi të ligjshëm e të rregullt, por ato nuk janë marrë në konsideratë.

Shkaku për marrjen e masës ishte emërtimi i Shoqatës në një website sportiv-TPSS. Ky website shërben për regjistrimin në kampionate taekwondo, dhe Shoqata jonë ishte e regjistruar me emrin Klubi Studenti, bazuar në kontratën e bashkëpunimit dhe përfaqësimit që kemi me klubin përkatës. Komisioni Ekzekutiv gjykoj se emërimi ishte i gabuar, pasi nuk korrespondonte me emërtimin e Shoqatës në vendimin e gjykatës.

Theksojmë se, në website, TPSS, të gjitha ekipet e taekwondos, kishin emërtim të shkurtuar, dhe jo emërtimin e vendimit të gjykatës për to.

Masë “Vërejtje” u mor vetëm ndaj Shoqatës tonë, dhe për më tepër, në rregullore nuk ka asnjë nen lidhur me emërtimet në të tilla website.

Në vendimet e fundit të Komisionit Ekzekutiv të datës 25 Maj, është propozuar që Shoqata jonë të kalojë në anëtar me të drejta provizore, pasi kemi përdorur simbolet e Klubit Studenti, me të cilin, theksojmë se kemi kontratë të ligjshme.

Theksojmë gjithashtu se, Shoqata jonë nuk është e vetmja shoqatë me kontratë me një Klub Shumësportësh, por është e vetmja shoqatë e cila është akuzuar dhe dënuar për këtë situatë. Simbolet e klubeve të tjera janë ekspozuar ndër vite pa sjellë shqetësim në Federatë.

Në përfundim, shoqata jonë vazhdimisht është diskriminuar nga sekretariati, komisionet ekzekutive, teknike dhe disiplinore të federatës Shqiptare të Taekwondo. Ky diskriminim shkon kundër parimeve sportive të fairplay, kundër statutit dhe rregullores së brendshme të federatës ku ne aderohjmë.

Gjendur në pamundësi për të patur komunikim të hapur dhe gjykim objektiv nga Federata Shqiptare e Taekwondo i drejtohem Komisionerit për Mbrojtjen nga Diskriminimi”.

Mbështetur në e-mailin datë 06.07.2023, SHRSS, sqaroi ndër të tjera se situata diskriminuese nga Federata Shqiptare Taekwondo-World, ndaj saj dhe anëtarëve, ka nisur në momentin e emërimit në pozicionin e trajnerit J. C dhe Shoqatës Rinore Sportive Studenti në Klubin Studenti.

Kjo pasi: “Organika e Federatës ka qenë kundër aderimit të trajnerit J. C dhe Shoqatës Rinore Sportive Studenti në Klubin Studenti, pasi këtë pozicion e dëshironin për një anëtar tjetër të federatës (z. Xh. H). Kjo dëshirë e tyre është tërësisht subjektive dhe ne si shoqatë kemi zbatuar rregulloren në çdo hap tonin. Dëmet e ardhura nga vendimet e Federatës Shqiptare të Taekwondo kanë qenë të shumta.

Në vitin 2021 trajneri J. C u punësua si trajner në Klubin Shumësportësh Studenti, bazuar në rregulloren e klubit në fjalë. Në datë 22.11.2021 është lidhur kontratë bashkëpunimi mes Klubit

Shumësportësh Studenti dhe Shoqatës Rinore Sportive Studenti, bazuar në rregulloren e klubit. Këto kontrata mundësojnë që Shoqata Rinore Sportive të përfaqësojë Klubin Studenti në të gjitha aktivitetet sportive, ku anëtarët e shoqatës marrin pjesë. Federata përkatëse e disiplinës së Taekwondo nuk e ka përkrahur këtë bashkëpunim të ligjshëm dhe menjëherë është shprehur kundër (referuar e-mailit datë 12.11.2021 të sekretarit të përgjithshëm të Federatës dhe deklaratës zyrtare në facebook të Federatës në datë 12.11.2021) dhe ka marrë vendime diskriminuese ndaj shoqatës dhe anëtarëve.

Në Nëntor 2021 në adresën e-mailit zyrtar të anëtarëve të Federatës Shqiptare Taekwondo, sekretari i federatës dërgon një e-mail ku pasqyron kërkesën e rianëtarësimit të klubit, si një kërkesë të “pa drejtë”, pasi organika e federatës nuk ishte dakord me trajnerin dhe shoqatën e aderuar tek Klubi Studenti. Sekretari shkruan në e-mail se ky pozicion ishte i dëshiruar nga një trajner tjetër, i përkrahur nga Federata Shqiptare Taekwondo dhe se nuk e përkrahnin trajnerin J. C dhe Shoqatën Rinore Sportive Studenti. Nga momenti që shoqata filloi bashkëpunimin me klubin, është sulmuar vazhdimisht nga Federata Shqiptare e Taekwondo. Duke gjykuar subjektivisht të gjithë situatën, organika e federatës ka gjykuar në dëm të shoqatës dhe anëtarëve të saj, me shkakun e vetëm se nuk ishte dakord me këtë bashkëpunim...

Në ligjin e sportit dhe VKM përkatëse, sportistët të cilët fitojnë vendin e parë në kampionatin ballkanik kanë të drejtën e një shpërblimi nga ana e MAS...”.

Subjekti ankues, kërkon nga Komisioneri për Mbrojtjen nga Diskriminimi, konstatimin e diskriminimit ndaj Shoqatës SHSRS, dhe marrjen e masave për heqjen e masës “Vërejtje” ndaj saj, si dhe Shoqata të qëndrojë si anëtare me të drejta të plota në Federatë dhe jo si anëtare provizore në të.

II. Ndjekja e procedurës për shqyrtimin e ankesës nga Komisioneri.

Komisioneri mori në shqyrtim ankesën, në referencë të kompetencës së parashikuar në nenin 32, pika 1, shkronja “a”, të ligjit nr. 10221/2010 “Për Mbrojtjen nga Diskriminimi”, të ndryshuar, që i jep të drejtën të shqyrtojë ankesat nga personat ose grupet e personave që pretendojnë se janë diskriminuar, sikurse parashikohet në këtë ligj.

Ligji nr.10 221/2010 “Për Mbrojtjen nga Diskriminimi”, i ndryshuar (LMD), garanton mbrojtje nga diskriminimi bazuar në një listë jo shteruese shkaqesh. Në nenin 1 të LMD parashikohet se: “Ky ligj rregullon zbatimin dhe respektimin e parimit të barazisë dhe mosdiskriminimit në lidhje me racën, etninë, ngjyrën, gjuhën, shtetësinë, bindjet politike, fetare ose filozofike, gjendjen ekonomike, arsimore ose shoqërore, gjininë, identitetin gjinor, orientimin seksual, karakteristikat e seksit, jetesën me HIV/AIDS, shtatzëninë, përkatësinë prindërore, përgjegjësinë prindërore, moshën, gjendjen familjare ose martesore, gjendjen civile, vendbanimin, gjendjen shëndetësore, predispozicionet gjenetike, pamjen e jashtme, aftësinë e kufizuar, përkatësinë në një grup të veçantë, ose me çdo shkak tjetër.”

Në nenin 3/1, të LMD parashikohet se: “Diskriminim” është çdo dallim, përjashtim, kufizim ose preferencë, bazuar në cilindo shkak të përmendur në nenin 1 të këtij ligji, që ka si qëllim ose

pasojë pengesën ose bërjen të pamundur të ushtrimit në të njëjtën mënyrë me të tjerët, të të drejtave e lirive themelore të njohura me Kushtetutën e Republikës së Shqipërisë, me aktet ndërkombëtare të ratifikuara nga Republika e Shqipërisë, si dhe me ligjet në fuqi".

Bazuar në nenin 7, pika 1, të Ligjit nr. 10221/2010 “Për Mbrojtjen nga Diskriminimi”, të ndryshuar, mbrojtja nga diskriminimi garantohet ndaj çdo veprimi ose mosveprimi të autoriteteve publike ose personave fizikë a juridikë, që marrin pjesë në jetën dhe sektorët publikë ose privatë, që krijojnë baza për mohimin e barazisë ndaj një personi apo grupi personash, ose që i ekspozon ata ndaj një trajtimi të padrejtë dhe jo të barabartë, kur ata ndodhen në rrethana të njëjta ose të ngjashme, në krahasim me persona të tjerë ose grupe të tjera personash.

Pas analizimit paraprak të ankesës, u konstatua se nga pikëpamja formale, ajo i plotësonte kërkesat e parashikuara nga neni 33/3 të ligjit 10221/2010 “Për Mbrojtjen nga Diskriminimi”, të ndryshuar. Në këto kushte Komisioneri, filloi procedurat përkatëse për shqyrtimin e saj.

1. Me shkresën nr. 7471, datë 15.07.2023, Komisioneri për Mbrojtjen nga Diskriminimi, ka njoftuar dhe kërkuar informacion nga Federata Shqiptare e Taekwondo World, për ankesën e bërë nga Shoqata, dhe kërkoi dokumentacionin si më poshtë:
 - Informacion dhe kopje të dokumentacionit mbi statusin e Shoqatës Rinore Sportive Studenti, si anëtare e Federatës Shqiptare të Taekwondo World.
 - Kopje të procedurës së ndjekur për dhënien e masës “Vërejtje” ndaj SHRSS-së.
 - Kopje të procedurës së ndjekur për propozimin apo vendimin që SHRSS të kalojë si anëtare provizore në Federatë.
 - Cilat janë rastet e parashikuara kur një shoqatë kalon anëtare provizore me të drejta jo të plota në Federatë? Kopje të akteve ku parashikohen raste të tilla.
 - Informacion nëse dy vendimmarrjet e mësipërme janë kundërshtuar nga ana e Shoqatës/subjekt ankues. Nëse po, kopje të korrespondencës së mbajtur mes jush.
 - Informacion nëse masa të tilla të ngjashme apo të njëjta janë marrë edhe për shoqata të tjera, anëtare të Federatës.
 - Informacion lidhur me faktin nëse emërtime të shkurtuara janë përdorur edhe nga shoqatat e tjera. Nëse po, informacion se cilat janë masat e ndërmarra nga ana e Federatës për secilin rast. (Bashkëlidhur dokumentacion provues)
 - A është e përcaktuar në ndonjë akt shkresor/rregullator, fakti se si duhet të jenë emërtimet e shoqatave pjesëmarrëse në këto website: me emërtime të plota apo të shkurtuara? Nëse po, kopje të këtyre akteve.
 - A ka patur shoqata të tjera, anëtare të Federatës që janë regjistruar me emërtime të shkurtuara dhe jo sipas emërtimit të plotë referuar vendimit të gjykatës, në këto website? Nëse po, rastet konkrete dhe cili është qëndrimi i Federatës, për secilin rast?
 - Si dhe çdo informacion tjetër që gjykohet të arsyeshëm dhe do të ndihmonte në sqarimin e plotë të kësaj çështjeje.

- Me shkresën nr. 202, datë 26.07.2023, Federata Shqiptare e Taekwondo World, në mes të tjerash informoi Komisionerin se:

“Lidhur me kontratën midis Shoqatës Rinore Sportive Studenti dhe Klubit Studenti, ne si Federatë nuk kemi pretendime. Vërejtja që i është dhënë ankuesit, ka të bëjë me faktin se Shoqata Rinore Sportive Studenti është regjistruar në kompeticionet kombëtare dhe ndërkombëtare si Klubi Studenti, kur sipas Statutit të Federatës në nenin 4, Anëtarësia dhe sipas Rregullores së Brendshme, Kreu III, neni 17 dhe Kreu V, në këto kompeticione marrin pjesë Shoqatat anëtare të Federatës tonë. Ndërsa Klubi Studenti nuk është anëtar i Federatës tonë. Fakti se midis Shoqatës dhe Klubit ka një marrëveshje, ajo duhet të zbatohet vetëm përse shkruhet aty midis dy palëve, por jo të veprohet në kundërshtim me Statutin e Federatës ku Shoqata Rinore Sportive Studenti është anëtare.

Në lidhje me Vendimin e Komisionit të datës 25.05.2023, është bërë vetëm propozimi që Shoqata Rinore Sportive Studenti të kaloj në statusin provizor, por akoma nuk është marrë një vendim nga Federata Shqiptare e Taekwondo World në lidhje me këtë propozim. Ky propozim do të shqyrtohet në Asamblenë e Përgjithshme të radhës, e cila akoma nuk është vendosur se kur do mblidhet.

Në lidhje me trajnerin J. C s’kemi patur dhe as nuk kemi problem me zgjedhjet e tij.

Në lidhje me pretendimet për trajnerin J. C, çdo vendim u është komunikuar palëve me e-mail dhe çdo informacion dhe përgjigje është dhënë në e-mail ku na kanë shkruar.

Gjithashtu vëmë re se në shkresat tuaja, kërkohen edhe dokumente të cilat nuk janë pjesë e pretendimeve për të cilat kërkoni shpjegime, kërkesa të cilat nuk i kuptojmë pse janë bërë.

Ankuesi për çdo pakënaqësi, duhej ti ishte drejtuar fillimisht Federatës, organeve të saj përgjegjëse për çdo sektor dhe pastaj Gjykatës, duke patur parasysh ligjin për OJF-të mbi bazën e të cilit Shoqatat marrin statusin juridik si edhe veprojnë e operojnë juridikisht dhe financiarisht.”

2. Mbështetur në nenin 33/8, të ligjit 10221/2010 “Për Mbrojtjen nga Diskriminimi”, të ndryshuar, për shqyrtimin e mëtejshëm të ankesës, Komisioneri me shkresën nr. 747/3, datë 09.10.2023 njoftoi, palët për zhvillimin e seancës dëgjimore.

Seanca dëgjimore u zhvillua me datë 25.10.2023, me praninë e dy përfaqësuesve me Prokurë të Posaçme⁵, të Shoqatës Rinore Sportive Studenti: J. C dhe I. K, dhe në mungesë të përfaqësuesve të Federatës Shqiptare të Taekwondo.

Përfaqësuesit e palës ankuese, gjatë seancës parashtruan të njëjtat fakte e rrethana që kishin paraqitur edhe në formularin e ankesës dhe në vijimësi gjatë komunikimeve me e-mail me KMD-në.

⁵ Prokurë e Posaçme me nr. repertori 934, nr. koleksioni 258, datë 05.07.2023, lëshuar nga Noterja A. M.

3. Në vijim të seancës dëgjimore, Shoqata Rinore Sportive Studenti, nëpërmjet e-mailit të datës 01.12.2023, ka falenderuar Komisionerin për procedurën e zhvilluar për shqyrtimin e ankesës, dhe ka kërkuar të tërhiqet nga ankesa e regjistruar me nr. 121 Regj., datë 16.06.2023, pranë Zyrës së KMD-së, pasi Shoqata po e ndjek këtë çështje në Gjykatë.

Në nenin 32, pika 3, të ligjit nr.10221, datë 04.02.2010 “Për Mbrojtjen nga Diskriminimi”, të ndryshuar përcaktohet: “3. Për shqyrtimin e ankesave që i drejtohen, Komisioneri zbaton normat e parashikuara në Kodin e Procedurave Administrative, me përjashtim të procedurave që parashikohen nga ky ligj.

Në nenin 90/3 të ligjit nr. 44/2015 “Kodi i Procedurave Administrative i Republikës së Shqipërisë”, të ndryshuar, parashikohet se: “Procedura administrative, e nisur me kërkesë apo kryesisht, deklarohet e përfunduar pa një vendim përfundimtar për çështjen, në rastet e parashikuara në nenet 93-96 të këtij Kodi. Deklarata e përfundimit të procedurës administrative, pa një vendim përfundimtar për çështjen, përbën akt administrativ”.

Në nenin 94⁶/1 të ligjit nr. 44/2015 “Kodi i Procedurave Administrative i Republikës së Shqipërisë”, të ndryshuar, parashikohet se: “Si rregull, në procedurën administrative të nisur me kërkesë, organi publik deklaron përfundimin e saj pa një vendim përfundimtar për çështjen, nëse pala që ka paraqitur kërkesën e tërheq atë”.

Procedura administrative konkrete pranë Komisionerit, është iniciuar mbi bazën e ankesës së paraqitur nga subjekti ankues, Shoqata Rinore Sportive Studenti, e cila, me anë të kërkesës të përcjellë nëpërmjet e-mailit datë 01.12.2023, është tërhequr nga ankesa e saj pranë KMD-së.

Bazuar në dispozitat e mësipërme ligjore, si dhe kërkesën për tërheqje nga ankesa, të paraqitur nga subjekti ankues në datën 01.12.2023, Komisioneri vlerëson se, procedura për shqyrtimin e ankesës me nr. 121 regj., datë 16.06.2023, të paraqitur nga Shoqata Rinore Sportive Studenti (SHRSS) kundër Federatës Shqiptare Taekwondo-World (FSHT), nuk mund të vazhdojë, por duhet të deklarohet e përfunduar pa një vendim përfundimtar, për shkak se subjekti ankues është tërhequr nga ankesa dhe nuk identifikohet ndonjë interes publik që do të legjitimonte vazhdimin e procedurës, nga ana e këtij organi publik.

PËR KËTO ARSYE :

Mbështetur në nenin 90/3 dhe 94/1 të ligjit nr. 44/2015 “Kodi i Procedurave Administrative i Republikës së Shqipërisë”, nenin 32, pika 1, shkronja “a” dhe nenin 33, pika 1, të ligjit 10221/2010 “Për Mbrojtjen nga Diskriminimi”, të ndryshuar,

Komisioneri për Mbrojtjen nga Diskriminimi,

⁶ “Tërheqja e ankesës”.

V E N D O S I :

1. Të deklarojë të përfunduar procedurën administrative për shqyrtimin e ankesës me nr. 121 Regj., datë 16.06.2023, të subjektit ankues Shoqata Rinore Sportive Studenti (SHRSS) kundër Federatës Shqiptare Taekwondo-World (FSHT), për shkak se subjekti ankues është tërhequr nga ankesa pranë KMD-së.
2. Kundër këtij vendimi lejohet ankim në Gjykatën Administrative të Shkallës së Parë Tiranë, brenda 45 ditëve nga marrja dijani.

KOMISIONERI

Robert GAJDA